

MAYA JESUS DATAI BARU - KEDUA KALI

“Reti nya genap kali kita makai roti tu lalu ngirup ari mangkuk tu kita madah ka pematih TUHAN DATAI KA IYA DATAI BARU.” (1 Korint 11:26).

A. JANJI PENATAI IYA KEDUA KALI.

Penatai Tuhan Yesus ti kedua kali ke dalam dunya siti pekara ti amat beguna ka raban orang Kristen. Orang ti nulis Bup Kudus Penyanggup Baru bisi lebih 300 kali madah ka utai tu lalu leka jaku ti dikena nerang ka utai amat beguna. Ia ti terubah patut ditemu ianya penatai Iya kedua kali nya AMAT DEKA NYADI!

1. Yesus Bejaku Ka Pasal Penatai Iya Baru.

“Udah nya tanda Anak Mensia deka pegari di langit; udah nya semua mensia di dunya tu deka nyabak, lalu sida deka meda Anak Mensia datai atas remang, ngena kuasa enggau mulia ti besai.” (Mathew 24:30). Peda mega ba John 14:2,3.

2. Bala Melikat Madah Ka Pasal Utai Tu.

Sida mengkang nengkadang ka langit lebu iya ninggal ka sida, lalu kemaya nya dua iko lelaki ti ngena gari burak bediri ngimbai sida. Ko seduai bejaku enggau sida, “Lelaki orang Galili! Nama kebuah kita bediri dia lalu nengkadang ka langit? Yesus, ti udah diambil ari kita lalu dibai niki ka serega, deka datai baru baka gaya iya ti dipeda kita niki ka serega.” (SPPR 1:10,11).

3. Orang Kristen ti keterubah merasang pangan diri pasal penatai Iya.

“Lebu munyi panjung ti meri ukum, munyi nyawa pengulu melikat, munyi terumpit Allah Taala, Tuhan empu deka nurun ari serega lebu nya ila. Barang sapa ti udah mati sereta arap ka Kristus deka angkat dulu; udah nya kitai ti agi idup lebu maya nya deka digempuru ka enggau sida di remang, betemu enggau Tuhan di langit. Nya alai kitai deka selalu begulai enggau Tuhan. Nya alai kitai patut ngelantang ka pangan diri enggau jaku nya.” (1 Tesalonika 4:16-18). Peda mega ba Pemandang 1:7.

4. Roh Kudus Besaksi Pasal Penatai Iya.

Tang Tuhan meh ti ketegal nya Iya nyendia ka kitai ka pasal tu enggau ti meri Roh ngagai kitai nyadi ka jamin semua utai ti udah disedia ka kitai.

“Nya alai menyadi, diau liat ati kita nganti penatai Tuhan. Peda gaya pengeliat ati orang bumai ti nganti tanah iya mansut ka asil ti diguna ka iya. Iya enggau ati liat, nganti penatai ujan musin buah enggau musin pengujan. Kita mega enda tau enda liat ati. Kering ka ati kita, laban penatai Tuhan nyau semak.” (James 5:7-8) Peda mega Hebrew 10:37.

B. BAKANI JESUS DATAI BARU?

1. Enda Disadang

“Enda ibuh kami nulis ngagai kita, menyadi, pasal timpuh enggau maya utai nya deka nyadi. Laban kita empu tentu nemu, Hari Penatai Tuhan deka datai baka penchuri ti datai

lebuah malam hari. Lebuah orang nyebut, “Nadai utai ngachau, likun,” udah nya penusah datai ngenyit ba sida! Sida enda ulih lari-iya deka sebaka enggau pemedis indu ti radai deka beranak.” (1 Tesalonika 5:1-3). Baca mega ba ayat 4-11.

2. Baka Kilat.

“Laban Anak Mensia deka datai baka kilat ti nyelar nyerangkap langit ari timur ka barat.” (Mathew 24:27). Pedana mega ba Luke 17:24.

3. Enggau Chara Ti Sama Lebuah Iya Niki Ka Serega.

“... Jesus, ti udah diambil ari kita lalu dibai niki ka serega, deka datai baru baka gaya Iya ti dipeda kita niki ka serega.” (SKPR 1:11b).

4. Enggau Kuasa Sereta Mulia Ti Besai.

“Udah nya Anak Mensia deka pegari atas remang, datai dalam mua hari ngena kuasa ti besai enggau mulia.” (Luke 21:27).

5. Semua Orang Deka Meda Penatai Iya.

“Pedana, Iya datai di atas remang! Genap iko urang deka meda Iya, nyengkaum sida ti numbuk Iya. Semua orang di dunya tu deka ngulit magang ketegal Iya. Tentu baka nya! Amin.” (Pemandang 1:7).

C. MAYUH UTAI DEKA NYADI

1. Penyelai Ti Nyadi Sepengelama Bejeman-Jeman Deka Dikamatka

“Sereta besumpah dalam nama Allah Taala, Iya ti idup belama-lama ia, Iya ti ngaga serega, dunya enggau tasik, enggau semua utai ti dalam sida, “Nadai betanggung agi! Tang lebuah melikat ti ketujuh nyepu terumpit iya, Allah Taala deka bejalai ka atur ti dipelalai iya munyi ti udah dipadah iya ngagai bala nabi ti nemiak iya.” (Pemandang 10:6,7). Pedana mega Rome 16:25-26.

2. Nemiak Tuhan Deka Tama Ke Dalam Mulia Sida

“Tang kitai peranak menua serega, lalu kitai enggau ati ti andal nganti Pengelepas kitai datai ari serega, iya nya Tuhan Jesus Kristus. Iya deka ngubah tubuh kitai ti lembut lalu ngaga sida baka tubuh iya ti bemulia, ulih kuasa nya iya tau mai semua utai diperintah iya magang.” (Pilipi 3:20,21). Pedana mega 1 Korint 15:35-53.

3. Semua Orang Ti Mati Dalam Kristus Deka Diangkat Ka Idup Baru.

“Kami nemu Allah Taala, iya ti udah ngangkat ka Tuhan Jesus idup baru, deka ngangkat ka kami enggau Jesus, lalu mai kami sama enggau kita ngagai iya.” (2 Korint 4:14). Pedana mega ba John 6:40; 11:25.

4. Semua Orang Arap Ti Agi Idup Deka Diangkat Awak Ka Betemu Enggau Iya.

“Terumpit ti besai deka disepu, lalu iya deka ngasuh bala melikat iya mansang ngagai empat bengkah sukut dunya, lalu sida deka ngempuru ka bala orang ti dipilih Allah Taala nyadi enggi iya ari sukut dunya sepiak ngagai sukut sepiak.” (Mathew 24:31).

5. Semua Utai Ti Idup Deka Dilepas Ka Ari Perintah Pengerusak.

“Nyadi semua utai ti digaga di dunya tu keran nganti deka meda bala anak Allah Taala pegari. Laban utai ti digaga di dunya tu diukum nyadi nadai guna, ukai ketegal peneka iya

empu, tang ketegal peneka Allah Taala. Tang tu meh pengadang nya, utai ti digaga di dunya tu, ka dudi ari deka dilepas ari perintah pengerusak, lalu sama bempu pengelepas ti bemulia baka sida anak Allah Taala.” (Rome 8:19-21). Peda mega ba ayat 22 enggau ba Isaiah 35:1-7.

6. Semua Munsuh Deka Dialah Ka.

“Udah nya pengujung dunya deka datai; Kristus deka ngalah ka semua pemerintah sitan; perintah dunya enggau kuasa, lalu iya deka nyerah ka perintah ngagai Allah Taala ti Apai. Laban Kristus enda tau enda megai perintah datai ka Allah Taala ngalah ka semua munsuh iya lalu ngasuh iya bekuasa atas sida.” (1 Korint 15:24-25). Peda mega ba 2 Tesalonika 1:7-10; 2:8.

7. Sitan Deka Ditanchang.

“Udah nya aku meda siko melikat nurun ari serega, jari iya megai kunchi lubang ti pemadu dalam enggau rantai besi ti berat. Iya nangkap naga nya, ular ti tuai nya-ia nya Tuai antu tauka sitan, lalu nanchang iya dalam pengelama seribu taun.” (Pemandang 20:1,2). Bacha mega ba ayat 3,7-10.

8. Pechara Deka Dipejalai Ka.

“Allah Taala dekan gereja utai ti lurus; iya deka merinsa ka orang ti merinsa ka kita, lalu iya deka ngasuh kita ti tusah diau lantang, lalu baka nya mega kami. Iya deka ngereja nya lebu Tuhan Jesus datai baru ari serega enggau sida bala melikat iya ti bekuasa, enggau daun api ti nyelar, kena ngukum orang ti ngenggai ka Allah Taala enggau sida ti enda ngasi ka Berita Manah Pasal Tuhan Jesus. Sida deka kena ukum, iya nya pemerinsa ti meruan belama, diserara ari Tuhan enggau mulia iya ti bekuasa...” (2 Tesalonika 1:6-9).

9. Siti Perintah Ti Enda Nemu Lenyau Deka Didiri Ka.

“Lebuh maya sida rajah nya megai perintah, Allah Taala serega deka nuduk ka siti perintah ti enda tau abis. Perintah nya enda ulih dialah ka orang, tang iya deka ngerusak sereta munggor ka semua perintah ti bukai, lalu mengkang meruan belama-lama.” (Daniel 2:44). Peda mega ba Pemandang 19:15,16.

KOMITMEN AKU

Penatai Jesus ti kedua kali ianya pengadang aku ti besai ti deka datai. Aku deka madah naka ni pemayuh ulih ngagai orang bukai tentang Jesus, Penyelamat aku, sebedau lya datai baru. Aku nyerah ka pengidup aku ngagai lya lalu nganti enggau ati ti andal ba hari enggau maya lya datai.